

## מִיכָה

1 דבר יהוה אשר היה אל מיכה המרשתי בימי יותם אחז יחזקיה מלכי יהודה אשר חזה על שמרון וירושלם: 2 שמעו עמים כלם הקשיבי ארץ ומלאה ויהי אדני יהוה בכם לעד אדני מהיכל קדשו: 3 כי הנה יהוה יצא ממקומו וירד ודרך על במותי ארץ: 4 ונמסו ההרים תחתיו והעמקים יתבקעו כדונג מפני האש כמים מגרים במורד: 5 בפשע יעקב כל זאת ובחטאות בית ישראל מי פשע יעקב הלוא שמרון ומי במות יהודה הלוא ירושלם: 6 ושמתי שמרון לעי השדה למטעי כרם והגרתי לגי אבניה ויסדיה אגלה: 7 וכל פסיליה יכתו וכל אתנניה ישרפו באש וכל עצביה אשים שממה כי מאתנן זונה קבצה ועד אתנן זונה ישובו: 8 על זאת אספדה ואילילה אילכה שילל וערום אעשה מספד כתנים ואבל כבנות יענה: 9 כי אנושה מכותיה כי באה עד יהודה נגע עד שער עמי עד ירושלם: 10 בנת אל תגידו בכו אל תבכו בבית לעפרה עפר התפלשתי: 11 עברי לכם יושבת שפיר עריה בשת לא יצאה יושבת צאנן מספד בית האצל יקח מכם עמדתו: 12 כי חלה לטוב יושבת מרות כי ירך רע מאת יהוה לשער ירושלם: 13 רתם המרכבה לרכש יושבת לכיש ראשית חטאת היא לבת ציון כי בכך נמצאו פשעי ישראל: 14 לכן תתני שלוחים על מורשת גת בתי אכזיב לאכזב למלכי ישראל: 15 עד הירש אבי לך יושבת מרשה עד עדלם

יבוא כבוד ישראל: <sup>16</sup> קרחי וגזי על בני תענוגיך הרחבי  
קרחתך כנשר כי גלו ממך:

## 2

<sup>1</sup> הוי חשבי און ופעלי רע על משכבותם באור הבקר  
יעשוה כי יש לאל ידם: <sup>2</sup> וחמרו שדות וגזלו ובתים  
ונשאו ועשקו גבר וביתו ואיש ונחלתו: <sup>3</sup> לכן כה אמר  
יהוה הנני חשב על המשפחה הזאת רעה אשר לא תמישו  
משם צוארתיכם ולא תלכו רומה כי עת רעה היא:  
<sup>4</sup> ביום ההוא ישא עליכם משל ונהה גהי נהיה אמר  
שדוד נשדנו חלק עמי ימיר איך ימיש לי לשובב שדינו  
יחלק: <sup>5</sup> לכן לא יהיה לך משליך חבל בגורל בקהל  
יהוה: <sup>6</sup> אל תטפו יטיפון לא יטפו לאלה לא יסג כלמות:  
<sup>7</sup> האמור בית יעקב הקצר רוח יהוה אם אלה מעלליו  
הלוא דברי ייטיבו עם הישר הולך: <sup>8</sup> ואתמול עמי  
לאויב יקומם ממול שלמה אדר תפשטון מעברים בטח  
שובי מלחמה: <sup>9</sup> נשי עמי תגרשון מבית תענניה מעל  
עלליה תקחו הדרי לעולם: <sup>10</sup> קומו ולכו כי לא זאת  
המנוחה בעבור שמאה תחבל וחבל נמרץ: <sup>11</sup> לו איש  
הלך רוח ושקר כזב אטף לך לייז ולשכר והיה מטיף  
העם הזה: <sup>12</sup> אסף אסף יעקב כלך קבץ אקבץ שארית  
ישראל יחד אשימנו כצאן בצרה כעדר בתוך הדברו  
תהימנה מאדם: <sup>13</sup> עלה הפרץ לפנייהם פרצו ויעברו  
שער ויצאו בו ויעבר מלכם לפנייהם ויהוה בראשם:

## 3

1 ואמר שמעו נא ראשי יעקב וקציני בית ישראל הלוא לכם לדעת את המשפט: 2 שנאי טוב ואהבי רעה גזלי עורם מעליהם ושארם מעל עצמותם: 3 ואשר אכלו שאר עמי ועורם מעליהם הפשיטו ואת עצמתייהם פצחו ופרשו כאשר בסיר וכבשר בתוך קלחת: 4 אז יזעקו אל יהוה ולא יענה אותם ויסתר פניו מהם בעת ההיא כאשר הרעו מעלליהם: 5 כה אמר יהוה על הנביאים המתעים את עמי הנשכים בשניהם וקראו שלום ואשר לא יתן על פיהם וקדשו עליו מלחמה: 6 לכן לילה לכם מחזון וחשכה לכם מקסם ובאה השמש על הנביאים וקדר עליהם היום: 7 ובשו החזים וחפרו הקסמים ועטו על שפם כלם כי אין מענה אלהים: 8 ואולם אנכי מלאתי כח את רוח יהוה ומשפט וגבורה להגיד ליעקב פשעו ולישראל חטאתו: 9 שמעו נא זאת ראשי בית יעקב וקציני בית ישראל המתעבים משפט ואת כל הישרה יעקשו: 10 בנה ציון בדמים וירושלם בעולה: 11 ראשיה בשחד ישפטו וכהניה במחיר יורו ונביאיה בכסף יקסמו ועל יהוה ישענו לאמר הלוא יהוה בקרבנו לא תבוא עלינו רעה: 12 לכן בגללכם ציון שדה תחרש וירושלם עיין תהיה ותר הבית לבמות יער:

## 4

1 והיה באחרית הימים יהיה הר בית יהוה נכון בראש ההרים ונשא הוא מגבעות ונהרו עליו עמים: 2 והלכו גוים רבים ואמרו לכו ונעלה אל הר יהוה ואל בית אלהי יעקב ויורנו מדרכיו ונלכה בארחתיו

כי מציון תצא תורה ודבר יהוה מירושלם: <sup>3</sup> ושפט בין עמים רבים והוכיח לגוים עצמים עד רחוק וכתתו חרבתיהם לאתים וחניתתיהם למזמרות לא ישאו גוי אל גוי חרב ולא ילמדון עוד מלחמה: <sup>4</sup> וישבו איש תחת גפנו ותחת תאנתו ואין מחריד כי פי יהוה צבאות דבר: <sup>5</sup> כי כל העמים ילכו איש בשם אלהיו ואנחנו נלך בשם יהוה אלהינו לעולם ועד: <sup>6</sup> ביום ההוא נאם יהוה אספה הצלעה והנדחה אקבצה ואשר הרעתי: <sup>7</sup> ושמתי את הצלעה לשארית והנהלאה לגוי עצום ומלך יהוה עליהם בהר ציון מעתה ועד עולם: <sup>8</sup> ואתה מגדל עדר עפל בת ציון עדיך תאתה ובאה הממשלה הראשנה ממלכת לבת ירושלם: <sup>9</sup> עתה למה תריעי רע המלך אין בך אם יועצך אבד כי החזיקך חיל כיולדה: <sup>10</sup> חולי וגחי בת ציון כיולדה כי עתה תצאי מקריה ושכנת בשדה ובאת עד בבל שם תנצלי שם יגאלך יהוה מכף איביך: <sup>11</sup> ועתה נאספו עליך גוים רבים האמרים תחנף ותחזו בציון עינינו: <sup>12</sup> והמה לא ידעו מחשבות יהוה ולא הבינו עצתו כי קבצם כעמיר גרנה: <sup>13</sup> קומי ודושי בת ציון כי קרנך אשים ברזל ופרסתיך אשים נחושה והדקות עמים רבים והחרמתי ליהוה בצעם וחילם לאדון כל הארץ:

## 5

<sup>1</sup> עתה תתגדדי בת גדוד מצור שם עלינו בשבט יכו על הלחי את שפט ישראל: <sup>2</sup> ואתה בית לחם אפרתה צעיר להיות באלפי יהודה ממך לי יצא להיות מושל

בישראל ומוצאתיו מקדם מימי עולם: <sup>3</sup> לכן יתנם עד  
 עת יולדה ילדה ויתר אחיו ישובון על בני ישראל:  
<sup>4</sup> ועמד ורעה בעז יהוה בגאון שם יהוה אלהיו וישבו  
 כי עתה יגדל עד אפסי ארץ: <sup>5</sup> והיה זה שלום אשור כי  
 יבוא בארצנו וכי ידרך בארמנתינו והקמנו עליו שבעה  
 רעים ושמנה נסיכי אדם: <sup>6</sup> ורעו את ארץ אשור בחרב  
 ואת ארץ נמרד בפתחיה והציל מאשור כי יבוא בארצנו  
 וכי ידרך בגבולנו: <sup>7</sup> והיה שארית יעקב בקרב עמים  
 רבים כטל מאת יהוה כרביבים עלי עשב אשר לא יקוה  
 לאיש ולא ייחל לבני אדם: <sup>8</sup> והיה שארית יעקב בגוים  
 בקרב עמים רבים כאריה בבהמות יער ככפיר בעדרו  
 צאן אשר אם עבר ורמס וטרף ואין מציל: <sup>9</sup> תרם  
 ירך על צריך וכל איביך יכרתו: <sup>10</sup> והיה ביום ההוא  
 נאם יהוה והכרתי סוסיך מקרבך והאבדתי מרכבתך:  
<sup>11</sup> והכרתי ערי ארצך והרסתי כל מבצריך: <sup>12</sup> והכרתי  
 כשפים מידך ומעוננים לא יהיו לך: <sup>13</sup> והכרתי פסיליך  
 ומצבותיך מקרבך ולא תשתחוה עוד למעשה ידיך:  
<sup>14</sup> ונתשתי אשיריך מקרבך והשמדתי עריך: <sup>15</sup> ועשיתי  
 באף ובחמה נקם את הגוים אשר לא שמעו:

## 6

<sup>1</sup> שמעו נא את אשר יהוה אמר קום ריב את ההרים  
 ותשמענה הגבעות קולך: <sup>2</sup> שמעו הרים את ריב יהוה  
 והאתנים מסדי ארץ כי ריב ליהוה עם עמו ועם ישראל  
 יתוכח: <sup>3</sup> עמי מה עשיתי לך ומה הלאתיך ענה בי:

4 כי העלתוך מארץ מצרים ומבית עבדים פדיתוך  
 ואשלח לפניך את משה אהרן ומרים: 5 עמי זכר נא  
 מה יעץ בלק מלך מואב ומה ענה אתו בלעם בן  
 בעור מן השטים עד הגלגל למען דעת צדקות יהוה:  
 6 במה אקדם יהוה אכף לאלהי מרום האקדמנו בעולות  
 בעגלים בני שנה: 7 הירצה יהוה באלפי אילים ברבבות  
 נחלי שמן האתן בכורי פשעי פרי בטני חטאת נפשי:  
 8 הגיד לך אדם מה טוב ומה יהוה דורש ממך כי  
 אם עשות משפט ואהבת חסד והצנע לכת עם אלהיך:  
 9 קול יהוה לעיר יקרא ותושיה יראה שמך שמעו מטה  
 ומי יעדה: 10 עוד האש בית רשע אצרות רשע ואיפת  
 רזון זעומה: 11 האזכה במאזני רשע ובכיס אבני מרמה:  
 12 אשר עשיריה מלאו חמס וישביה דברו שקר ולשונם  
 רמיה בפיהם: 13 וגם אני החליתי הכותך השמם על  
 חטאתך: 14 אתה תאכל ולא תשבע וישחך בקרבך ותסג  
 ולא תפליט ואשר תפלט לחרב אתן: 15 אתה תזרע  
 ולא תקצור אתה תדרך זית ולא תסוך שמן ותירוש  
 ולא תשתה יין: 16 וישתמר חקות עמרי וכל מעשה בית  
 אחאב ותלכו במעצותם למען תתי אתך לשמה וישביה  
 לשרקה וחרפת עמי תשאו:

## 7

1 אללי לי כי הייתי כאספי קיץ כעללת בציר אין  
 אשכול לאכול בכורה אותה נפשי: 2 אבד חסיד מן  
 הארץ וישר באדם אין כלם לדמים יארבו איש את

אחיהו יצודו חרם: <sup>3</sup> על הרע כפים להיטיב השר שאל  
 והשפט בשלום והגדול דבר הות נפשו הוא ויעבתוה:  
<sup>4</sup> טובם כחדק ישר ממסוכה יום מצפיך פקדתך באה  
 עתה תהיה מבוכתם: <sup>5</sup> אל תאמינו ברע אל תבטחו  
 באלוף משכבת חיקך שמר פתחי פיך: <sup>6</sup> כי בן מנבל  
 אב בת קמה באמה כלה בחמתה איבי איש אנשי ביתו:  
<sup>7</sup> ואני ביהוה אצפה אוחילה לאלהי ישעי ישמעני אלהי:  
<sup>8</sup> אל תשמחי איבתי לי כי נפלתי קמתי כי אשב בחשך  
 יהוה אור לי: <sup>9</sup> זעף יהוה אשא כי חטאתי לו עד אשר  
 יריב ריבי ועשה משפטי יוציאני לאור אראה בצדקתי:  
<sup>10</sup> ותרא איבתי ותכסה בושה האמרה אלי או יהוה  
 אלהיך עיני תראינה בה עתה תהיה למרמס כשיט  
 חוצות: <sup>11</sup> יום לבנות גדרריך יום ההוא ירחק חק: <sup>12</sup> יום  
 הוא ועדיך יבוא למני אשור וערי מצור ולמני מצור  
 ועד נהר וים מים ונהר ההר: <sup>13</sup> והיתה הארץ לשממה  
 על ישביה מפרי מעלליהם: <sup>14</sup> רעה עמך בשבטך  
 צאן נחלתך שכני לבדד יער בתוך כרמל ירעו בשן  
 וגלעד כימי עולם: <sup>15</sup> כימי צאתך מארץ מצרים אראנו  
 נפלאות: <sup>16</sup> יראו גוים ויבשן מכל גבורתם ישימו יד על  
 פה אזניהם תחרשנה: <sup>17</sup> ילחכו עפר כנחש כזחלי ארץ  
 ירגזו ממסגרתיהם אל יהוה אלהינו יפחדו ויראו ממך:  
<sup>18</sup> מי אל כמוך נשא עון ועבר על פשע לשארית נחלתו  
 לא החזיק לעד אפו כי חפץ חסד הוא: <sup>19</sup> ישוב ירחמנו  
 יכבש עונתינו ותשליך במצלות ים כל חטאותם: <sup>20</sup> תתן  
 אמת ליעקב חסד לאברהם אשר נשבעת לאבתינו מימי

7:20 מִיָּקָה

viii

7:20 מִיָּקָה

קדם:



מודרני עברי ד תנ  
**The Holy Bible in Modern Hebrew**

Public Domain

Language: עברית (Hebrew)

Translation by: Franz Delitzsch (1813–1890)

2022-06-14

---

PDF generated using Haiola and XeLaTeX on 21 Feb 2024 from source files dated 31 Aug 2023

53d9715c-3509-54f2-9e87-2cb0afdfb800